

皇明史竊

皇明史竊卷之第二十八

桑張花胡耿趙韓俞列傳第六

東莞尹守衡著

桑世傑者無爲人也自少慷慨有大志張德勝者合肥人也豪邁多材畧此兩人者皆廬產是時汝潁盜起有左君弼者亦廬人起據廬州世傑兩人集衆各千餘人結砦巢湖中伺變而湖中諸少年相聚者巢人有俞廷玉父子廖永安趙伯仲諸兄弟含山人有華高合肥人又有葉昇合軍萬餘共保湖中君弼黨數從湖上往來時侵軼世傑等與戰輒不利甚苦之及太祖下和陽世

傑等私相語曰方今群雄並起人人各欲舉大事吾等勢必不能與君弼共爭此土不如有所屬夫識時變者爲俊傑吾聞和陽軍日有聲於江北此真吾主也盍往歸焉衆皆以爲然遣人間道來輸款太祖喜語善長曰吾業已集數萬衆欲渡江獨舟師未備此來良應我機天贊我也乃自將兵至巢湖納之時趙普勝屯黃墩所謂雙刀趙者乃是太祖亦欲招降之普勝顧自異謀劫太祖世傑等覺之白太祖挾兵歸營太祖旣收世傑等軍以是渡江克采石下太平行定江東諸郡縣因置各

翼元帥府處諸將世傑德勝皆授秦淮翼元帥府常州
德勝陞僉院世傑陞院判是時太祖保有江東稍欲飲
馬浙西收其地自廣世傑等常從徐常二將軍西略頻
年水軍數出戊戌正月世傑與永安等出討江陰石牌
賊樂瑞世傑陷陣死永安以爲賊殺瑞其冬永安亦以追
敗吳兵深入太湖爲吳僉趙普勝時歸陳友諒陷我池
州德勝與戰于柵江口破走之復池州與俞通海畧地
太湖入至馬跡山降其水寨將王貴巳亥從徐將軍取
安慶夜襲趙普勝浮山砦大敗其衆追斬僞參政郭泰

沙河友諒之敗走龍灣德勝因追至采石歿于陣我師
遂克安慶大祖令伯仲守之亡何友諒又破安慶伯仲
自盡死俞廷玉復往攻安慶不克死之上憐世傑
贈永義侯德勝贈蔡國公謚忠毅與楚國公廖永安三
人皆侑享太廟廷玉贈河間郡公洪武六年詔定世傑
謚禮臣言光武封寇恂爲承義侯景丹奉義侯世傑侯
名永義不必重謚從之世傑等凡七人多不終獨華高
宗升兩人身封侯洪武三年高封廣德侯卒崖州謚武
忠升十二年平西番封靖寧侯後坐胡黨謫死伯仲死

太祖以其弟趙庸嗣職後封南雄侯德勝死子幼養子汪興祖嗣職後封東勝侯從傅將軍伐蜀中飛石死世傑子敬後封徽先伯

花雲者懷遠人也初謁太祖偏濠太祖見其驍勇使將兵每出略地輒前行定遠人繆大亨有衆二萬屯橫澗山雲率壯士百人夜襲取之太祖以是收合其衆得以南下滁陽雲體長大面鐵色嘗單騎衛太祖前行遇賊千人于道從騎皆未至雲提尺劒躍馬橫衝賊陣而過賊皆驚避相與語曰此黑將軍勇甚不可與爭鋒從取

和陽授管勾從渡江克太平侍宿衛從定金陵遷總管
徐達下鎮江雲出收降諸下縣過馬駝沙賊壘相望邀
道中雲行三日夜遇賊輒與殺殺幾盡克常州駐甯牛
塘其年立行樞密院太平陞院判明年下常熟獲卒萬
人太祖悉令屬雲將之從攻寧國時陳友諒破安慶數
侵畧我池州太祖慮之乃進雲階安遠大將軍使守太
平太平爲江東肘腋地與友諒隣壤友諒旣據江州自
立爲漢王遂來寇時雲城中兵止三千人出與結陣連
戰三日殺我元帥朱文遜雲率士卒乘城拒守賊不得

入而城西南隅下瞰姑溪賊引巨舟乘漲泊城與城頭
雉堞等賊共攀緣舟尾上城而城中士卒久乏食餉甚不
能戰城遂陷賊縛雲急雲怒罵曰賊奴縛吾吾主必滅
爾曹斯爾爲膾也奮躍大呼縛皆絕雲起奪刀連斫六
人賊急併力縛雲懸舟檣叢射之雲至死罵不絕口時
年三十九妻卽聞城陷抱三歲子泣屬侍女孫氏曰城
陷王公必死王公死吾必不獨生然花氏血肉止此耳
汝等爲我善護此兒至上前遂赴水死於是孫收卽屍
潛瘞之急抱兒逃又遇賊虜之行賊中惡兒啼梓孫及

兒投江中孫謹抱兒出沒水中幾絕會有斷木上流至
孫挾兒附木浮入蘆渚中得不死孫採蓮實啗兒依渚
中七日夜半聞人語聲呼之乃一老父自稱雷老告之
故老父令與俱行得達高皇帝所孫抱兒拜且泣高皇
帝亦泣置兒膝上曰此將種也命賜老父衣老父已不
見追之無所得衆以爲神兒後名煒太祖爲吳王贈雲
東丘郡侯煒八歲上令侍皇太子學年十三授虎賁右
衛副千戶既長授水軍左衛指揮僉事世宗入繼大統
贈邵氏貞烈夫人孫氏安人并與雲立祠遼東

胡大海者虹人也長身鐵面太祖之既下滁州大海水
謂太祖一見與語合命爲前部先鋒從渡江定江左皆
冠軍陞右翼統軍元帥侍宿衛出佐鄧愈守宣州定徽
嚴陞行樞密院判攻下蘭溪陞僉院守蘭溪太祖往定
浙東過蘭溪因薦和州人王宗顯從攻婺州克之太祖
悅乃以大海爲行省參政以宗顯知府事太祖
語大海曰婺吾浙東重地非卿無可守者吾令遇春
佐卿卿與衢處紹興三郡皆密邇進取之宜好共籌之
宋伯顏不花守衢州多知略處守石_門宜孫善用士紹

興爲呂珍所據亦張氏名帥此三人者皆勦敵不可忽也命都事王愷參軍事大海既受命其明年遂下諸暨以常將軍克衢州龍泉守將胡深收處中四邑反宜孫來就降因言大海曰處中之民日相尋于兵戈亦已苦矣家有些糧人無鬪志攻之可唾手得也是時耿再成一軍先攻黃龍山待進取大海乃出樊嶺與再成軍合連進戰宜孫數軍初據險皆敗走宜孫自策不能守棄城遁大海遂定處州呂珍憤諸全之失于我來入寇亦爲大海所困幾獲之珍急馬上折矢求解誓不復入處

州界大海許之引兵還叅軍王愷曰猾賊難信不如乘
勢追擊之可大獲大海曰吾許其言而背之不信縱其
去而擊之不武乃止庚子陳友諒寇龍灣太祖使大海
擣信州及敗友諒大海亦克信州大海子德濟常從父
軍中太祖見其能授德濟以行樞密院同僉令守信友
諒等遣其將李明道來攻信德濟自以軍少嬰城守請
援於父大海又自引兵親至信禽明道歸太祖太祖因
用明道爲鄉導降下江西明道具輸漢情于我漢賊明
道陰有力焉大海在婺州民間不得攘茅一莖苗將劉

震蔣英大海初下嚴時降將也大海喜二人驍勇留麾下分使震黨李佑之等往戍處州佑之使人約震共反震不可曰胡將軍遇我厚我不忍佑之報曰人將忍爾爾舉大事寧顧私恩乎於是震等佯詣大海請觀營大海上馬出英袖鐵椎從後擊大海中腦絕并殺愷二人走降張士誠呂珍因遂寇諸全李文忠急欲救諸全徵兵信德濟未及奔父難急引信兵走諸全宵攻之呂珍夜遁吳軍自相蹂亂皆盡殺無復輪返者已而謝再興又諸全則又與文忠築新城守之以距吳陞行省參政

已又與文忠大破吳軍新城軍二十萬陞左丞後從文忠下杭州距大海之死已五年始得生縛蔣英歸于京師太祖令懸大海像市曹刃英血以祭超贈大海越國公謚武莊大海嘗曰吾武人不知書吾行兵惟知有三事不殺人不虜人婦女不焚人廬舍以故所至健兒謹附編民寧輯嘗夜出婆人見大海兩目炯炯光若燈旣薨敵兵犯境軍中或夢若生時或夜見火光滿野洶洶聞人馬聲師出輒大捷德濟亦有父風初往守新城時其部將先是家留嚴州者悉載以隨文忠乃疑德濟使

之誅其都事羅彥敬諸部將咸憤怒謂我等守方面委
命征戰乃畧不相容謂德濟何處不富貴寧忍辱乃爾
德濟曰右丞之殺彥敬別爲軍中事豈爲我哉爾等無
多言言則軍法亦不爾貸矣上聞故責文忠曰爾乃不
能牢籠人物胡德濟之德量爾不及也洪武三年征莊
浪失律大將軍械還京上宥之後以都指揮使出鎮陝
西卒

耿再成者五河人也初從太祖授百戶歷功元帥守鎮
江已改守揚吳人數寇宜興復徙守宜興尋還守揚太

祖收金華從爲先鋒克處州陞院判復徙守處州先是
處州兵士皆徵私粟民間號苦糧民苦之莫敢誰何再
成白參政胡大海悉罷之苗將蔣英反婺州其黨李佑
之在處州亦同以其日反再成方飲客聲聞變即跨馬
出不及收戰卒迎賊罵曰俘虜奴國何負汝乃反急解
甲降不降吾斫汝萬段揮劍取賊連斷賊數掣兵不繼
賊迎刺中項墮馬大罵不絕口死都事孫炎亦死之再
成贈高陽郡公洪武二年進脩享太廟三年加贈泗國
公謚武莊子天璽太祖令嗣父職仍守處州累功陞處

州衛指揮副使從下杭州改嚴州衛同知後從征討四方有功進階安遠將軍復改仁和世襲七年出海捕倭以疾卒

趙德勝者鳳陽人也初隸元歸德王忙哥麾下爲隊率甲午間母在滁陽軍中棄妻子來歸爲帳前先鋒前援六合左股中流矢幾始從渡江下太平授總管從建業克毗陵陞中翼左副元帥陳友諒寇龍江德勝獨軍虎口城虎口龍江第一關也明年太祖擣江州下南昌德勝與諸將各引兵分定江西諸郡縣祝宗康泰反南

昌他郡縣因之皆復叛而歸漢德勝又引兵復定之攻
南昌砲傷左肩南昌定太祖詔姪文正爲大都督鄧愈
爲參政德勝爲僉院同鎮守是時友諒已走武昌明年
自將武昌軍號六十萬載巨艦圍南昌因復陷吉安陷
臨江以吉安守將右副指揮使劉齊右翼元帥朱潛統
軍元帥許圭臨江同知趙天麟等來徇城下德勝與漢
相距六十餘日時時出城與戰射殺其一梟將金指揮
漢圍日急而我軍守禦亦固時德勝巡守三門漢兵望
見德勝坐東門樓上指畫發蹶張弩一矢正中德勝腰

脅矢深入六寸德勝拔矢出嘆曰吾自壯歲從軍傷矢
石數矣重亡踰此者豈命也夫大丈夫死即死耳第不
能從主上掃清中原稍效微勛垂令名於竹帛可恨也
遂卒德勝死友諒晝夜盡攻擊建康音問久不通文正
欲遣告急建康四面皆漢兵不能出有軍士號捨命王
者請於文正曰臣願以身殉漢誑友諒約日出降友諒
必信臣言止不攻待其懈此時乃可以間出文正遣捨
命王往友諒果信之止不攻文正以是得遣千戶張子
明從水關潛出至期城上戰守益具友諒方知捨命王

詐也縛至城下殺之子明小舟間關夜行晝依凡十五
日得達建康見上上問友諒兵勢若何子明曰漢兵雖
盛而戰鬪死者亦不少今江水日涸敵之巨艦將不利
用又師久糧乏援兵若至可必破也上曰汝歸語文正
但堅守一月吾當自取之不足慮也子明還至湖口漢
兵得之以見友諒友諒勞之曰若能誘城降非但不死
吾立富貴汝子明佯許之至城下大呼我張大舍已見
王上令諸公堅守大軍旦夕且至友諒怒攢槊刺之死
于城下子明臨濠人張天祐元帥子也友諒城德勝贈

梁國公侑享太廟謚武莊子明初贈武毅將軍飛騎尉千戶後加贈忠節侯捨命王三其名不知何許人是時南昌死事臣最衆然子明得以申請救之力文正得以蓄戰守之備捨命王功最偉然南昌廟祀軍士死者二人張德山夜半出焚賊舟死贈千戶夏茂成守城樓當賊衝中砲死贈總管捨命王贈卹獨不及余故附見傳中厥後鄱陽之戰有韓成者虹人也時太祖所乘舟偶膠于沙漠相張定邊入犯太祖舟甚急太祖舟爲所窘成言太祖曰臣聞古人有殺身成仁者臣不敢辭請

龍袍冠冕與上同誼漢軍爲上赴水死漢軍見之以
成之死也信爲上趣爭欲得成皆緩上舟不攻會得諸
將皆入援而太祖遂得脫于敵險友諒敗死上還建康
議所以褒贈死事諸臣成爲首封高陽郡侯建忠臣祠
康卽山成位第一蔭子觀爲散騎舍人帶刀侍衛觀洪
武五年從征沙漠授廣西桂林衛都指揮僉事累功進
廣西都司都指揮使右軍都督府都督同知鎮守廣西
永樂九年從平交趾鎮守交趾卒于鎮

俞通海者俞廷王之長子也廷王與諸子宣力江東獨

通海陷敵功多授秦淮翼元帥廷王死太祖乃令通海
仍嗣父職僉書樞密院事擊吳江右目中流矢失明再
破雙刀趙復池州進同知從征陳友諒江州將兵前定
斬黃還下安慶從戰鄱陽上舟膠漢乘之甚急上舟欲
退不能脫上窘甚通海僦舟入援進湧上舟上舟脫而
通海舟反逼敵艦爲所壓士爭以首抵艦鐵帽盡破當
是時微韓成行紀信之策上幾殆然上舟瀕危而復卽
安者通海力也通海又與廖永忠汪興祖趙庸等六舟
深入博敵上望之久不復見意通海等已陷沒俄見六

舟飄飄遶擊敵艦而出我師奮前合擊大敗敵兵通
言於上曰湖水多淺戰舟不利廻旋莫若移舟入江據
上游敵舟若入我直禽之易耳劉基亦請徙軍湖口上
從之友諒窘果繞下流而遁我軍追擊射殺之師還上
賜通海與永忠田及金帛漢亡上爲吳王遷中書省平
章政事克廬州攝行江淮行省事守廬州繕墉壑興農
六民寧輯大將軍討姑蘇通海却其兵下太倉降定
崐山崇明嘉定松江諸郡縣入擊桃花塢中流矢創甚
還京病且革上臨視問曰平章知予來問疾乎通海不

能語上揮淚出遂卒上哭之慟超贈豫國公令通海第
通源領其軍嗣兄職通源屢從大將軍北定中原克元
都有功三年封南安侯通海改贈虢國公謚忠烈侑享
太廟通源以二十二年詔還鄉上令建第巢使優老尋
卒又弟通淵以父兄故克泰侍舍人歷功封越雋侯二
十六年坐累罷爵建文元年召爲豹韜衛指揮使戰白
溝河歿于陣

論曰數公皆國初所謂以死勤事之臣也大丞侑食而
東丘獨遺何哉亡何又罷楚公將效死者忠而失守人

德難追不屈者節而南冠之耻未滌乎若至功臣廟祀
永義復闕嗟哉名重於器以至是乎是故賞其志節典
秩宜崇原其早殞叙勲則未也

皇明史竊卷之第二十九

胡何韓曹陸梅列傳第七

東莞縣守衡著

胡美者沔人也初名廷瑞仕陳友諒爲江西行省丞相
守南昌太祖旣下江州招諭美美欲降同僉康泰者美
之甥與平章祝宗二人皆不欲美卽專心不能安二人
乃爲二人陳請願各還守故部曲太祖賜書慰藉之甚
至太祖如南昌而袁州守將黃彬亦就南昌來款太祖
益嘉納與美等皆仍其故官宗泰友亦以美故宥泰及
卽帝位授美征南將軍總大師平閩進中書省平章兼

同知詹事院事其後上叙諸將功謂持兵負固於兩間可觀望而不觀望來歸者七人美與彬與焉七人者當太祖之初起左君弼據廬州楊璟自合肥至僞宋都大梁韓政睢州至曹良臣安豐至張士誠奄有淮甸陸聚以徐州守將至梅思祖以淮安守將至是時江東雖稍定而四方雄桀相與爲敵者未可勝數七人皆敵產皆不肯爲敵用先後皆歸我以故太祖大嘉悅太祖嘗問思祖曰汝等先事故主徃徃皆受重名食其祿今來歸我寧無舊主之思乎思祖對曰草昧之際臣等誠欲擇

豪傑以自附今幸去彼而從主上猶出昏暗覩天日敢
有二心太祖曰汝豈真知我之可附哉思祖曰臣觀主
上豁達大度英明雄斷推赤心以任人輟衣食以賞士
令行禁止真命世之主也臣等誠得所歸太祖曰汝等
旣無二心當戮力建功以保富貴思祖頓首謝七人獨
美與楊璟有方面勳璟別有傳彬聚皆以參政仍守故
州歷功俱階中奉大夫思祖初從趙均用王保保臨其
父均用死從張九四旣而歸我張九四復劄其弟數人
上憐焉特授大都督府副使洪武三年論功行封七人

皆封列侯爵也見開國紀中美後改封臨川侯二十六年卒良臣以洪武五年從曹國公征迤北領東道兵取和林至阿魯渾河深入與虜戰歿上痛悼之贈光祿大夫追封安國公謚忠壯政守山東征河北數有功十一年卒贈鄆國公思祖守雲南善撫輯民夷安之十五年卒美與思祖卒後皆坐黨事戮其家彬聚亦與坐得原宥亡何卒

何真者東莞人也初仕元爲務使管勾等小官也至正中中原兵起莞民王成陳仲玉二人亦相搆亂稱二王

真請於行省起義兵攻仲王禽之而成循紫守真募之
能縛成者予鈔十千於是成奴縛成出真解成縛引坐
笑謂曰公何養虎爲患耶成掩面慙謝曰成始以爲循
孰知虎也奴求賞真如數予之使人具湯鑊烹奴駕轉
輪車令數人推之彌子衆曰四境無如奴縛主以罹此
刑也又使數人鳴鉦督奴妻噓火奴號則群應之曰四
境有如奴縛主者視此諸邑子不聞之服真賞罰有章
以爲光武之待蒼頭子密不能及也競來歸已而惠州
守將黃常叛擁惠州惠人聞真威信迎真往逐之戮其

黨王仲剛於是行省授真以惠州路判同知廣東都元帥事真因撫有梅循二州地二十一年廣東廉訪使八撒刺不花盡殺廉訪司官據廣州於是諸邑豪民各逐其長吏一時並起南海三山盜邵宗愚遂假義旅執八撒刺殺之城中擾亂真聞自惠還攻宗愚宗愚走還三山真復遣弟何勉分兵討平諸邑豪民行省乃復進真爲左丞分省廣州真開府署延名士孫養王佐等共參軍事或陳符瑞職爲尉佗計者真卽逮戮之受元正朔徐待天下時變德慶人李質守端州稱一時豪帥真遣

真佐二人往招之質遂通好湖南盜入寇德慶真遣兵
往助討平辟爲行省真外卽而是時三山賊未嘗一日
忘真往往稱真僭號以號召四方亟欲攻真通真部將
馬丑寒叛據博羅真自引兵蒞惠討平而宗愚遂乘真
去陷廣州明年真還民爭出城應真宗愚懼復還走真
旣得復廣州制授榮祿大夫陞右丞東連潮惠西達蒼
梧皆真保障洪武元年廖永忠師下福州移書諭真真
知天命有歸元祚已燼率父老縞素大臨於常衙聽奉
圖籍歸命高皇帝大喜手詔褒諭以真保境安民以待

有德視漢竇融唐李勣多議侍召乘傳入朝賜白金文
紉侍膳內廷授中奉大夫江西行中書省參知政事諭
之曰天下紛爭所謂豪傑有三易亂爲治者上也保民
達變識所歸者次也負固偷安流毒生民身死不悔斯
無足論矣頃者師臨閩越卿卽輸誠來歸不煩一旅之
力使兵不血刃民庶安堵可謂識時達變者矣真叩頭
謝曰昔武王伐暴救民諸侯不期而會者八百今主上
除亂以安天下天命人歸四海景從臣本蠻邦之人始
者逢亂不過結聚鄉民爲保生之計寔無它志今幸遇

大明麗天無幽不燭臣愚豈敢上遠天命上曰夫能
賢禍于生靈者必世享其澤朕嘉卿忠誠念江西地
廣東特授卿江西行省叅政以表來歸之誠夫令名德
之興也卿令名已著尚懋修厥德以輔我國家真洎官
有德有威政令風行霆斷而王於寬厚三年召還京還
山東九年致仕十三年請以子貴叅侍東宮上授貴北
城兵馬指揮十四年受命與貴同往雲南畫糧餉開道
路以候大軍征進還陞山西右布政使十六年致仕復
受命與貴還廣收集土豪萬六百二十三人還朝貴拜

明威將軍鎮南衛指揮僉事上復官其從子三人軍校
致十人授管軍百戶十八年召起爲浙江左布政使明
季入朝調湖廣二十年致仕八月封東莞伯食祿千五
百石子世恭復子子宏尚寶司丞二十一年三月真豐
年六十七真爲人豐偉美鬚髯吐音如鐘少時有相者
謂曰公才兼文武霸王之器惜生南方微帶火色位不
過封侯卒如其言長子榮二十一年襲封東莞伯後以
監黨坐罪褫爵次貴次宏皆死于黨禍初真之歸命也
質亦隨真入覲授奉訓大夫中書省斷事五年遷刑部

侍郎踰月遂晉尚書遣賑山東御製詩賜之以寵其行
詩曰遣卿持檄按齊東念爾賢勞苦歎功經國老臣勳
撫恤行天使者起疲癯官儲有粟宜從賑囊橐無私任
至公七十二城皆歷還授中奉大夫浙江行中書省參
知政事八年復授資政大夫靖江府右相在官四載而
卒

論曰當秦鹿之既失七君各擁州郡識真主於其逐之
秋遂能感會風雲裂封茅土殆千載之一遇乎若使朝
南暮北徒徘徊於子陽文伯之間庸足幾也何真保有
南服即欲追蹤趙尉夫豈不足自王計安系梓屈首服

邇一十餘年迨夫大明麗天尺書南下夫然後縞素以
謝故君蒲佺以迎新命去就有禮非夫泥首銜玉者良
足羞也

皇明史竊卷之第三十

小方明納列傳第八

東莞尹守衡著

小明王韓林兒者欒城人韓山童之子也山童祖父世爲白蓮會燒香事佛江淮河洛之衆皆來從至山童時棗陽人有男周歲暴長四尺腹皤如僧山童倡言彌勒佛下生明王出世衆信之潁人劉福通妖人也詭與其黨杜遵道羅文素盛文郁劉六等謀曰元人腥臊中國久矣民心思亂天將還宋舊物山童宋徽宗八世孫宜爲中國主誠以山童起爲天下倡民當響應遵道等以

爲然遂欲共尊山童倡義兵兵皆紅巾殺白馬黑牛祭
天地誓告衆約共起有期矣縣官覺急捕山童去福通
遂以其衆反山童之妻楊氏夜挈韓林兒逃之武安福
通走據朱臯破羅山真陽鶴山行收兵至葉陷汝寧光
息衆至十萬於是一時豪黨皆特起蕭人李二一陷徐州
羅田人徐壽輝陷蘄水及黃州泰州人張士誠陷泰州
及高郵尋李二爲脫脫太師敗走而徐張皆假尊號號
召四方江右湖南諸郡縣壽輝席卷幾盡矣福通遂自
陽州夾河迎韓林兒于武安至以爲帝號小明王都亳

州仍宋國號改元龍鳳尊楊氏爲皇太后以杜遵道盛
文和爲丞相自與羅文素爲平章劉六知樞密院事福
通許惡遵道專搆殺遵道自爲丞相政令皆已出韓林
兒懸空名于上而已是時太祖已起濠州福通復通好
太祖欲引諸將爲已用因檄滁陽王之子爲都元帥張
天祐爲右副元帥太祖爲左副元帥太祖不受於是郭
與天祐往而福通亦不敢外太祖遙與太祖相聲援太
祖渡江馳檄四方遂亦紀年龍鳳從宋舊也其年福通
與元平章答失八都魯戰于長葛敗之答失八都魯走

中牟收其散卒進與劉哈刺不花兵合大敗福通兵太
康遂圍亳州福通懼夜奉小明王遁走安豐太祖既有
江東滁陽王之子與張天祐皆棄福通復來從太祖二
人至方山皆戰死福通保守安豐行收兵復聚既踰年
遣其黨毛貴畧地山東貴兵遂拔膠州殺樞臣脫歡取
萊陽殺守臣釋嘉納服益都貴兵大振福通自將攻汴
梁汴梁城守未下福通進取曹濮破大名及衛輝答失
八都魯以奔命卒于曹太不花尋復大名福通趣還擊
大梁大梁守將竹貞棄城遁福通入據大梁復迎小明

王至都之分遣關先生破頭潘等故皆汝穎群盜引一
軍寇晉冀白不信大刀敖李喜喜等引一軍趨關中貴
攻濟南並搏霄宣慰山東貴與戰敗績會詔搏霄還守
河間貴因遂取濟南搏霄尋遇貴南皮貴與戰殺之搏
霄被刺無血惟一白氣騰騰獨上而滅貴乘勝出河間
破薊州元君議北巡遷避焉劉哈刺不花拒貴柳林貴
兵還濟南黃河萬戶田豐棣州千戶俞寶滕州萬戶王
信皆殺其長吏降貴貴是時已奄據山東遙受命於小
明王然山東地小明王不能有也白不信與關先生等

兵出關陝關陝守臣不能制元君乃詔察罕鎮陝西李
思齊屯鳳翔白不信陷秦隴據鞏昌察罕自將鐵騎馳
二百里與李思齊會擊不信等兵潰敗走李喜喜遁入
蜀關先生破頭潘等分兵三道一出絳州一出沁州踰
太行焚上黨破遼州陷冀寧而雲中鴈門代郡間烽火
數千里察罕遣其部將關保等分兵阻隘而自勒重兵
屯聞喜絳陽塞井陘杜太行以控扼之二將乘利破上
都焚宮闕晉七日轉掠遼陽而去是時福通諸將四出
皆敗竹長驅然兵無節制所至徒剽掠果殺人人人避

匡遠竄不願來歸以故所得地輒復失人無固志而蔡
罕念大梁已失西北事俱付諸將自還洛陽而懷慶守
將周全遂擬懷慶叛降于劉福通蔡罕乃使伯帖木兒
守盩厔城拒全周全又擊盩厔城殺伯帖木兒盡驅懷
慶民渡河入汴於是福通益于周全兵往攻蔡罕蔡罕
不與全戰登城責全不義全慚恐謝蔡罕退兵還福通
誅全殉于軍蔡罕大發秦晉軍圍汴梁分門而轟夜斬
關人福通力不支遂奉小明王還走安豐而是年李二
之將趙均用自淮來依貴遂殺貴貴死田豐據守山東

蔡罕卒攻下之白不信破頭潘等皆散滅而劉福通自
保小明王守安豐日寤矣是時張士誠已據平江有淮
浙徐壽輝之將陳友諒已殺倪文俊都江州福通更不
能得志它路惟是一介行人往來江東間而又不能俛
首江東徒自保顧太祖念小明王爲後於宋以伐元奉
宋約不肯以寸鐵遺安豐憂福通在安豐既三年爲至
正癸卯張士誠之將呂珍將兵十餘萬攻安豐福通告
急建康太祖使徐達往援未至而安豐破呂珍殺福通
小明王單騎來奔依太祖至丙午而殂太祖時已爲吳

王牒文猶曰皇帝聖旨其王令旨不別建年號稱龍鳳
小明王既殂始改號稱吳元年

論曰小明王固黎眉公所指爲牧豎者也劉福通挾之
以假宋室倡亂四方其初豈有遠圖乘時擾攘徒爲大
盜雄耳及鼓烏合之徒黨東卷西殘衡行齊晉河陝之
間京甸爲之震動其資藉畧可憑矣使據大梁行弔伐
蘊玉璽於海東取精兵於日本前人故事夫豈難圖而
仁義罔聞暴以暴代宜其無足以憚察罕諸人而吳得
擬其後也

方谷珍者黃巖人其初楊嶼盜徒也膂力絕人至正四年縣官懸購大盜苗蔡亂頭谷珍出應賞格帥徒屬追捕而賊中魁宿急甚覆欲中傷谷珍求脫免首告谷珍實與蔡通詭捕名自匿吏乃并逮谷珍谷珍忿曰蔡能爲盜我不能耶方食逮至谷珍左手執食卓爲翼蔽右手執斧格殺十餘人亡入海吏不能得連械齊民爲谷珍黨民亡谷珍所旬日而得數千人谷珍曰元苦吾民久矣等死不如死衆而谷珍少時嘗請宦家戴其至人夢有黑龍蟠廳事廊柱竊視之谷珍也以女妻之其民

固已怪之矣至是則相與謀推爲長擁船千艘據海道
絕糧運而旁海州郡皆藉谷珍粟台溫慶元三路六州
十一縣皆屬焉省臣累奉詔命討之不能得招之輒又
叛去予官治中并官其弟姪皆不受命而且執其州縣
長吏以爲質竟爲所脅得授節鉞坐鎮浙東開治于鄞
郡人章子善走說谷珍曰夷狄無百年之運元數將極
不待知者可知也今蒙傑並起分裂天下足下奮襁一
呼千百之舟數十萬之衆可立而待沂江而上則南北
中絕糧饋運之粟馳四出之師青徐遼海閩廣甌越傳

極可定審能行此則人心有所屬而霸業可成也谷珍
曰公言良是然智謀之士不爲禍始不爲福先朝廷雖
無道猶可以延歲月豪傑並起智均力敵天下事未可
知且莫若保境安民以俟真人之出吾志也願公勿復
言子善謝去至正十八年高皇帝克婺州使使招諭谷
珍谷珍作以三都來獻而使子完入質上曰英雄豪傑
義氣相許何疑而質子耶遣之還谷珍請如錢鏐故事
歲貢白金助軍興而不奉我正朔南交陳友定北通擴
廓問之則惶慄謝過而以金玉飾馬鞍轡來獻上卻之

上方勵志中原使者交于境上庶民而已其後上克杭
州谷珍徇屏蔽海隅上怒諭之書曰汝初納款謂杭城
下即獻土來歸此汝左右之士共保富貴之良謀也豈
意汝懷奸挾詐陽降陰叛數相愚弄張士誠與汝壤地
相接取爾甚易然所以不敢加兵于汝者誠以吾力能
制之汝故得安處海隅坐享三郡之富貴是我大庇於
汝也汝乃自爲不祥背棄信義時遣奸細覘我動靜潛
結遠援汝何惑之甚也今明以告汝吾兵下姑蘇卽南
取溫台慶元水陸並進無能禦也汝早於此時改過效

順能盡以小事大之義猶可保其富貴以貽子孫以反
下人如其不然集三郡之兵與我一較勝負亦大丈夫
之所爲不然舍三郡之民爲偷生之計揚帆乘舟竄入
海島然吾恐子女玉帛反爲汝累舟中有自生敵國徒
爲豪傑所笑也非分之恩不可數得汝宜慎思之谷珍
猶木块上命朱亮祖馬步舟師往討之其弟國瑛守台
州遁走番嚴國珍亡入海姑蘇平湯和與廖永忠軍且
至國瑛降谷珍從海上遣子完奉表待罪其表曰臣聞
天無所不覆地無所不載王者體天法地於人無所不

容臣荷陛下覆載生成之德久矣安敢自外於天地敢
一陳愚衷惟陛下財幸臣本庸才處乎季世保境安民
非有黃屋左纛之念曩者陛下霆擊雷掣之師至於婺
州臣愚以爲天命有在遣子入侍於時固已知陛下有
今日矣所謂依日月之末光望雨露之餘澤者也而陛
下開誠布公賜手書歸質子俾守郡縣如錢鏐故事十
年之間與中吳角立皆陛下之賜戢也逮天兵下臨吳
會臣嘗上書謂朝定杭越則暮歸田里不意今年以來
老病交攻頓成昏昧而弟兄子侄志慮不齊致煩陛下

興問罪之師方懷憂懼未能自明而大軍已至台溫令
臣計無所出雖遣使再三而承詔之師勢不容已是以
封府庫開城郭以候王師之至然猶未免爲浮海之計
者昔有孝子于其親也遇小杖則受大杖則走臣之事
適與相類雖然臣一介草莽安敢自絕于天地故每自
思欲面縛待罪闕庭復恐陛下萬一震雷霆之怒天下
後世不謂臣得罪之深將謂陛下不能容臣豈不累天
地之大德哉謹昧死奉表以聞俯伏候命上讀表曰孰
謂方氏無人哉是可以活其命矣宥其罪使來谷珍至

上且喜曰若來何晚介珍叩首謝罪上曰朕推赤心待汝其自安授谷珍廣西行省左丞亡何上聞表出谷珍都事詹鼎草使召鼎鼎爲書萬餘言詣闕下叩車駕上之上立馬受讀付丞相官鼎鼎寧海人美鬚髯威儀甚都丞相奏爲刑部郎中谷珍不得之官奉朝請一日侍上燕坐不能興與至第成末疾上乃官其二子禮爲指揮使完爲鎮撫谷珍疾革上使問所欲言谷珍曰臣荷陛下厚恩無尺寸功而子孫庸魯絕不知人問事臣所憂獨此耳幸陛下以臣故曲加保全則臣感恩九泉爲

大馬報陛下矣先屬諸子曰我即死毋歸壑海濱主上
遇我過厚可求皇城外之地埋焉且使後人習於禮義
上欣然曰可

明玉珍者隨州人也身長八尺目重瞳子汝穎兵起玉
珍團保青山徐壽輝招致之使爲元帥守沔陽玉珍嘗
與元將哈林禿戰飛矢中其右目人呼爲旻眼子沔陽
饑王珍將斗船五十艘上夔府哨糧是時重慶守將完
者都行收兵辰州人楊漢有兵五千屯平西完者都欲
併其軍誘漢來謁殺之漢軍怒走遇王珍於巫峽訴其

言重慶一城並有左丞相哈林禿右丞相完者都
不相下都無厚兵可攻也玉珍從其言與萬戶戴壽
等分船爲二以其半載糧還沔陽以其半因漢兵攻重
慶完者都聞其來先遁去玉珍生獲哈林禿玉珍師入
重慶秋毫無所犯旁都聞之皆詣玉珍獻降玉珍歸哈
林禿于漢陽壽輝以玉珍爲隴蜀省右丞其明年戊戌
完者都行與戴壽定守將平章朗革又參政趙資謀攻玉
珍玉珍先使其義弟明二進攻壽定破之完者都與朗
革又遁去資保大佛寺明二執資妻子江斬以招資

資嘻曰痴婦不死何爲汝不見平章婦乎平章婦朗革
反妻也城陷時赴水死語畢以強弩射殺其妻復欲射
其子爲衆所擁不得射明二與資持半載資軍亦潰走
王珍以是威行西蜀奄有諸郡歲修貢賦于漢陽在蜀
四年陳友諒自稱大號弒壽輝且欲犯建康使使來徵
兵王珍怒斬其使絕不與通而戴壽等遂推王珍爲隴
蜀王王珍初過瀘州見元進士劉禎與之語喜曰吾得
一孔明也拜爲參謀於是說王珍曰西蜀形勝之地東
有瞿塘北有劍門沃野千里自遭青巾之虐民物彫耗

明公撫養民幸蘇息人心之歸天命可知若不稱大號以繫人心恐軍士俱四方之人或思其鄉土而去明公孰與守此乎遂以壬寅年春三月卽帝位于重慶國號大夏建元曰天統元年倣周制設六卿以戴壽爲冢宰萬勝爲司馬勝卽明二張文炳爲司空何大亨莫仁壽爲司寇吳友仁鄒興爲司徒劉禎爲宗伯立妻彭氏爲皇后子昇爲皇太子明年癸卯爲天統二年遂發巴蜀兵取雲南萬勝從界首鄒興從建昌指揮芝麻李從八春軍分三道勝軍不滿萬人一以當十長驅直抵雲南

梁王把都走威楚勝軍屯金馬山以待鄒李二軍二軍
久不至已而梁王求救於大理旦暮兵且至勝慮孤軍
遠懸士卒又多戰傷難久持遂引還天統三年更立中
書省樞密院壽爲左丞相勝爲右丞相向大亨張文炳
爲都察院以鄒興鎮成都吳友仁鎮保寧莫仁壽鎮夔
門俱爲平章以竇英爲參政鎮播州以荆玉商希孟俱
爲宣慰王鎮永寧希孟鎮黔南王珍在蜀興教化薄徭
賦百姓樂其寬和及聞友諒已破賊漢地悉歸太祖王
珍乃遣其參政江儼來通好太祖報之書曰足下

而起居地上流區區有長江之險相爲唇齒勸心同力
併復中原惟足下圖之太祖有招玉珍意而玉珍亦不
異外太祖第以地遠處遠據險自安而已帝蜀五年而
卒年三十六子昇嗣位改元開熙昇方十歲毋以皇太
子同聽政太祖既爲皇帝命取大木并亦遣使來貢上
數遣人諷令入朝并不省洪武三年吳友仁入寇興元
金興旺擊却之是年上欲假道攻雲南戴壽不奉命四
年乃興師虜昇還夏亡

論曰方谷珍首倡東南之亂虎踞三郡喜其無他遠猷

名托臣元西界張吳東鄰江左犧牲玉帛待于二境卒
能身脫死亡不踵吳漢大倂知其初志有足懷者明玉
珍竊帝一隅以高深自安臨視四方獨憐江東之好夫
英雄之所趨舍隱然知漢鹿之有歸矣天假之年何至
煩潁川之旅出東莞之後哉靜言思之可爲太息

納哈出者元木華黎裔孫也上初下太平也納哈出以萬戶被俘上以其爲名家子遇之善而納哈出常不樂上使萬戶黃疇私察其去就納哈出求歸上欲遣之徐將軍力阻上勿遣上曰人臣各念其主况有父母妻子之思竟資遣去納哈出得歸久之有衆二十餘萬孳畜富於元主元主官之太尉不肯預朝會召之亦不往洪武四年平章劉益以遼東來降而納哈出是時據守金山與平章高家奴等時時出沒遼東塞下劉益故黨洪保保乘間殺益走從納哈出上乃以馬雲兼旺爲都指

揮使往鎮之已而高家奴等相繼降上遣黃疇齎書往諭納哈出納哈出殺疇入寇蓋州蓋州盡清其野壁不與戰納哈出示所得趣攻金州金州指揮富與戰禽其裨將乃刺吾納哈出失利欲退走馬雲等設伏大敗之於連雲島僅身免上以納哈出久爲遼東患討之未可百全不若降服之遣送乃刺吾北還予書并讓納哈出命宋國公勝率列侯步騎二十萬隨其後勝至通州謀虜有屯慶州遣永昌侯王輕騎乘大雪掩之殺其平章朵來納哈出欲遂棄金山北走新泰上聞密勅勝曰

新泰去遼陽千八百里群胡雖起營北行計離金山尚未遠以兵捉之勢必來降虜且謂我得志慶州無意窮追必順逐水草往來黑山魚海之間耳乘其趑趄攻其無備虜衆可盡圖也勝師遂渡遼河徑壓金山而是時乃到吾追至松花河得見納哈出納哈出大驚曰吾謂汝死矣今日乃復得相見執手勞問殷勤乃刺吾因諭上所以遣還德意納哈出喜即遣左丞探馬赤至勝軍敲馬而乃刺吾備語虜衆朝廷撫恤我輩輩恩甚厚虜衆聞之多有願降者矣勝大軍直前逼納哈出之部將

全國公觀童遂來降納哈出因亦遣人請轅門獻款勝
遣副將軍王往受之納哈出覘知明兵盛不可敵指天
噴曰天不復與我有此衆矣遂率數百騎詣玉王大
出酒與飲甚相懽納哈出因酌酒酬玉王請先之納
哈出即先飲復酌授玉王解衣納哈出謂曰請服此
而後飲納哈出不肯服王亦持酒不飲爭之急納哈出
取酒澆地顧左右咄咄語鄭國公常茂有麾下解胡語
謂此且欲遁也告茂茂直前手縛納哈出納哈出大驚
起就馬茂拔佩刀砍之傷臂不得去與都督耿忠擁見

勝勝下塔慰謝納哈出使耿忠共寢食善視焉而納哈
出妻子及將士尚二十萬留松花河北聞之驚潰欲來
追勝遣觀童往諭遂亦盡降其衆輜重亶百餘里納哈
出至京師見上上封海西侯食祿二千石賜其官屬祿
秩有差其明年從傳將軍征雲南至武昌卒納哈出嗜
飲燒酒醉好浴時常盛夏因浴致疾上每戒其飲不聽
竟以是死賜葬南京是年改封其子察罕濟陽侯坐黨
死